

## AJK Masjid Ayer Lanas Hulur Bantuan

Oleh: Amirul Akmal Zakaria

**JELI:** Masjid Imam Haji Taib melalui program Infaq pada 27 november 2020 telah memberi sumbangan kepada kira-kira 20 keluarga asnaf di sekitar Kampung Ayer Lanas dan kampung Kolam Ikan.

Sumbangan berupa makanan dan duit ini bertujuan meringankan beban keluarga terbabit disamping memberi sedikit kelegaan menghadapi kehadiran pandemik Covid-19.



Bendahari Masjid Imam Haji Taib, Mokhtar Bin Abdullah (kanan) menyampaikan sumbangan barangan keperluan kepada golongan Asnaf yang dipilih.

Setiausaha Masjid, Ramli Mamat yang mengetuai program tersebut, Perintah Kawalan Pergerakan (PKP) yang bermula pada 18 Mac lalu menyebabkan ramai pihak terkesan daripada segi kewangan apabila tidak dibenarkan untuk bekerja seperti biasa mahupun membuat sebarang aktiviti di luar.

Beliau berkata, masih ramai golongan yang kurang bernasib baik dan kurang upaya di luar sana yang memerlukan bantuan masyarakat yang berkemampuan lebih-lebih lagi yang hilang punca pendapatan.

Sementara itu, Ahli Jawatan Kuasa Program, Sabariah Yaa'cob berkata, pihak masjid telah mengambil langkah prihatin dengan mengumpul dana hasil sumbangan jemaah masjid dan orang kampung serta hasil jualan lembu korban untuk disalurkan kepada mereka yang memerlukan.

"Pemberian sumbangan ini berdasarkan dapatan dan tinjauan bersama ahli jawatankuasa dibantu oleh Tok Penghulu yang mengambil keputusan membantu golongan terkesan di kariah ini" katanya.



Orang ramai sedang mengambil makanan yang disediakan oleh pihak Masjid Imam Haji Taib

Beliau berkata, program pada tahun ini juga dilaksanakan dengan mengikut prosedur kawalan Covid-19 yang disarankan oleh Kementerian Kesihatan Malaysia (KKM) terutamanya berkaitan penjarakan sosial dan memakai pelitup muka dalam kalangan semua yang terlibat.

"Pihak kami juga mengucapkan ribuan terima kasih kepada semua yang terlibat menjayakan program ini dan berharap jemaah masjid mampu membantu lebih ramai lagi golongan asnaf pada tahun-tahun akan datang," katanya.